

Junior Boys National Football C'ship 2025: BC Roy Trophy: Mad ka Meghalaya ia ka namrem ha ka jingialehkai ba nyngkong

SHILLONG, Naitung 21: Ka Meghalaya ka la mad ia ka jingshah rem kaba jur ha ka kynhun ialehkai jong ka Kerala, kata haduh 5-1 kol ha ka jingialehkai kaba nyngkong jong ka Jylla ha ka Junior Boys National Football Championship 2025 (Tier 1) na ka bynta ka Dr BC Roy Trophy ha Amritsar

hynne ka sngi Nyngkong. Ka Kerala ka la pynkhihjar nyngkong ha kane ka jingiakhun jong ka Group B lyngba u Muhammed Mijuwad (10') shuwa ba ka Meghalaya kan pyniakhaid lyngba u Baniar Kharsahnoh (18') hadien 8 minit. Ka jingiakhun ka la neh

beit tang mar kawei ka kol (1-1) haduh kaba kut jong ka kylla step hynrei ka Kerala ka la lah ban synshar donbor ha ka kylla miet, da kaba thep sa saw tylli ki kol lyngba u Jithu B (48'), u Mohammed Sinan P (64', 76') bad u Muhammed Hayan TP (84'). Ka Meghalaya kan hap ban bishar bad hikai ialade

na kane ka jingiakhun bad ban wanphai da kaba tyngeh ha ka jingialehkai kaba bud ka ban sa long hadien ar sngi, ka ban long pyrrshah ia ka lahduh ba iada ia ka burom ka West Bengal lashai ka sngi Balang. Ka West Bengal ka la jop ia ka jingialehkai kaba nyngkong jong ka pyrrshah ia ka Tamil Nadu da 2-1 kol.

SSA U-20 4th Division 2025: Shah pynshitom ka Laitumkhrach ba sei madan da ki player bym iahap, ioh jingmyntoi ei ka Golfink

SHILLONG, Naitung 21: Ka Laitumkhrach, kaba haduh mynta ka dei kawei na ki kynhun kaba khilai tam ha ka lypmung ialehkai phutbol 'U-20 Fourth Division 2025' jong ka Shillong Sports Association, ka la shah pynshitom ha ka SSA namar ba ka la pynmih madan ia saw ngut ki rangialehkai ki bym iahap bad ki kyndon jong ka lypmung ha ka jingiakhun ia ka wat kaba ar (pre quarter final) pyrrshah ia ka Golfink ha ka taiew ba la dep.



rangialehkai, ba kynthup ia u Dabetskhem Rongpei, u Mebankhraw Nongrum, u Mebakor Iawphniaw bad u Yeomanry Son Shadap, kiba ka SSA ka la pyntip ha ka rai jong ka ba kim dei satia ban ioh mih madan ia ka Laitumkhrach namar kim pat ioh ia ka jingkyndria klob (Club transfer) ha ka rukom kaba ju long katkum ka kyndon no. 28 jong ka Football Tournament Rules, Shillong Sports Association. Kumta ka Tourmament Committee jong ka SSA ka la ai khusnam ia ka Golfink ban jop da 3-0 ia ka jingialehkai ba dang shu dep pyrrshah ia ka Laitumkhrach, kabalah ban long ka jingmyntoi kaba khraw ia katei ka kynhun (Golfink) ban iohrung sha ka

wat iakhun quarterfinal watla kam shym la thep wat tang shi kol ruh ha baroh ar tylli ki jingialehkai round robin jong ka wat iakhun pre quarter final. Ka Laitumkhrach kan iakhun pyrrshah ia ka Laitlulung ha kane ka sngi Baar bad kan donkam ban jop la kumno kumno da 3-0 kol ia kane ka jingialehkai ban iohrung bad ban leh ia kane khlem da don ne pynmih madan ia ki saw ngut ki rangialehkai ba la kded haneng, kiba la shah sospon na ki lypmung ialehkai jong ka SSA na ka bynta shisnem namar ka jingiaid lait ia ki kyndon ha ka jingialehkai pyrrshah ia ka Golfink ha ka 18 tarik u Naitung.

Second Division EJHDF: Khur jingjop ka Lumshnong YWSC, iakhaid ar tylli ki jingiakhun

JOWAI, Naitung 21: Ka lypmung ialehkai phutbol 2nd Division League Stage 2025 bala pyniaid da ka East Jaintia Hills District Football Association (EJHDF) kaba la long mynta ka sngi 21 tarik ha madan Artificial Ground Diengshynrum, Khliehriat. Haba phai sha ka jingiakhun kaba nyngkong hapteng ka Kairang CSC bad ka Lumshken SC kila poi sha ka jingiakhaid khlem don kiba ioh ban thep kol (0-0). Haka jingiaikhun kaba ar ka Lumshnong YWSC kala jop da 4-0 kol ia ka Lumputhoi SC, ia kitei ki kol na ka Lumshnong YWSC la thep da u Rida o Rupai



haka minit ba 2 & 77, u Shkem boklang Rupai haka minit ba 19 bad u Justine Niang haka minit ba 27. Katba haka jingiaikhun kaba lai hapteng ka Mulieh YWSC Suchen bad ka Lakadong Ummat SCC kila

ia khiaid da mar 3-3 kol, ia ki kol na ka Mulieh YWSC Suchen la thep da u Hamedahun Lamo haka minit ba 5 & 57 bad u Teibor Swer haka minit ba 67. Ia ki kol naka Lakadong Ummat SCC la thep da u Pynbha

Miki haka minit ba 33, u Seibormi Suchen haka minit ba 49 bad u Eibormi Lyngdoh haka minit ba 56. La pyntip ba ka jingiakhun kan bteng haka 23 tarik u Naitung ha ki lai tylli ki jingiakhun.

Mynjur ka Liverpool ban soi ia u Hugo Ekitike na Frankfurt

SHILLONG, Naitung 21: Ka Liverpool ka la mynjur ia ka kontrak bad ka Eintracht Frankfurt jong ka Bundesliga na ka bynta ban soi ia u rangialehkai ba shakhmat u Hugo Ekitike, katkum ki tyllong khubor. La khmihlynti ba une u rangialehkai na France un pyndep ia ka jingpeit bniah lane ka medical test jong u ha kine ki sngi ban wan bad un leit ban iasoh bad ka Liverpool ha ka jingialehkai ban pynkhreh ia ka samoi ialehkai ban wan ha Hong

Kong. Kane ka jingiateh kontrak ka lah ban kot £79m, ka lah ban kiew sha ka £89m lada siew pyndep ia ki jnit ki jnat. U Ekitike, uba la sdang ia ka jingialehkai jong u na Reims, u la soi bad ka Paris Saint-Germain ha u snem 2023, hadien ba u la mih madan bad kane ka lahduh jong ka Ligue 1 ha u snem ba bud. U la shah shim wai noh ha ka Frankfurt ha u snem 2023, ha kaba u la lah ban



ialehkai bha shuwa ban shah soi pura ha katei ka klob ba radbah na Germany ha u snem 2024.

Ha ka samoi ba la dep, u la thep 15 kol kyntip bad 8 tylli ki assist ha ki 33 sien ialehkai.



Nangjan ka Barcelona ban wanrah ia u Marcus Rashford

SHILLONG, Naitung 21: Ka jingthmu jong ka Barcelona ban wanrah ia u Marcus Rashford ha ka kynhun ialehkai ka la nangjan, hadien ba une u rangialehkai ba shakhmat jong ka Manchester United, u la pass ia ka Medical test ha Barcelona, shuwa ba u mih madan ia kane ka lahduh jong ka La Liga da kaba shu shim wai. Une u rangialehkai ba 27 snem ka rta, u la wanpoi ha Catalonia ha ka miet Sngi U Blei hadien ba u la ioh jingbit na ka United ban pyndep ia ki jingdonkam na ka bynta ka jingkyndria klob sha Catalonia. La iakynduh ia une u rangialehkai ka England da u manager ka Barcelona u Hansi Flick bad u sporting director u Deco ha madan kilanmet jong ka klob ha ka step jong ka

sngi Nyngkong. Ka jingiaken hapteng ka Barcelona bad ka United ka la iaidei stet ha ka taiew ba la dep, ha kaba la mynjur ia ka jingiateh kular katkum ki nongrim ha ka taiew ba kut. Ka Barcelona ka la mynjur ban siew ia ka bainong jong u Rashford na ka bynta kane ka jingshim wai kaba neh slem ha kane ka samoi ialehkai hadien ba u la pdiang ia ka jingpynhiar tulop kaba 25% bad kaba la pynduna ia ka United kumba £14m ban siew ia ka tulop. Katei ka jingiateh, kaba dei na ka bynta ki 12 bnai, ka kynthup ia ka lad ban thied ha ka dor kaba £30.3m (35m Euro). U Rashford un sa shah pynbna paidbah ha ki lad pathai khubor ha kane ka sngi Balang ban wan.

Lahduh ka EKHD ha ka 10th Meghalaya Jeet Kune-do Championship



SHILLONG, Naitung 21: Ka East Khasi Hills District ka la paw kum ka lahduh jong ka 10th Meghalaya Jeet Kune-do Championship ba la long ha MSMA Training Centre, Laitkor Kyntom-U- Mon. Kane ka Championship

kaba ar sngi lynter ka la long kaba seisoh ha kaba la sdang ia ka naduh ka 18 tarik haduh ka 19 tarik Naitung, 2025, hapoh ka jingpeit bad pyniaid jong ka Meghalaya Jeet Kune-Do Association [MJKA]. La plie paidbah ia kane ka Championship da u Bah P.Mawri, Rangbah Shnong jong ka Laitkor Mawri Lumheh. Katba ha ka sngi pynhap pyrda bad sam khusnam la wan da u Chairman ka MSMA u Bah Donny

Ranee. Ki nongialehkai baroh ki long 150 ngut kiba la iashim bynta ha kane ka lypmung ialehkai Jeet Kune-Do ba la kded haneng, ba kynthup ia ki District bapher bapher jong ka Jylla, kata kiba na East Jaintia, West Jaintia, West Khasi Hills, Eastern West Khasi Hills, West Garo bad East Khasi Hills District. Nadien ka East Khasi Hills District kaba la ioh ia ka nam Champion Team ka West Jaintia Hills District ka la ioh ia ka kyrdan ba ar lane ia ka nam runner's – up Team

Ha kane ka sngi na ka liang jong u President ka MJKA u la pyntip ba ki nongjop na kane ka Championship kin sa shah jied ban iashim bynta ha ka lypmung ialehkai Northeast Jeet Kune-Do Championship kaban long ha u bnai Nailar, 2025 ha Cotton College, Guwahati bad kumjuh ruh ia ka lypmung ialehkai 35th National Jeet Kune-Do Championship ka ban sa long ha u bnai Naiwieng ha Talkatora, New-Delhi.

SSA 3rd Div 2025: Thep u Balviki ia ka hat-trick ba nyngkong Jop ka Umrynjah, Lumparing & Iatylli

SHILLONG, Naitung 21: Ka Umrynjah SC ka la jop ia ka jingialehkai ba nyngkong jong ka ha ka lypmung ialehkai phutbol kyrdan Third Division 2025 ba la pyniaid da ka Shillong Sports Association ha madan First Ground-SSA stadium, Polo, hynne ka sngi Nyngkong da kaba pynliem noh ia ka Rynjah SC da 5-2 kol.



Ha kane ka jingialehkai la ioh ruh ban sakhi ia ka hat trick kaba nyngkong kaba la thep da u Balviki Margnar (44', 63', 90'+2'min) na bynta ka Umrynjah. Kumjuh ruh ha ka Group B, ka Lumparing SC ka la pynliem ia ka Imson SC da kaba jop da 3-2 kol katba ha ka Group C ka Iatylli SC ka la pynliem ia ka Gorkha Association da 2-1 kol. Ha ka jingialehkai kaba nyngkong u Wanborlang L Nongbri (2'min) u la pynkhih ia ka kol kaba kloi tam mynta ka samoi na bynta ka Umrynjah shuwa ba ka Rynjah SC kan jubab da

kaba pyniakhaid lyngba u Venquish Pohlong (24'min). U Balviki u la pynkhih ia ka kol kaba nyngkong jong u ha ka 44 minit shuwa ban kut ka kylla step ban buh biang hakhmat ia ka Umrynjah. Ka jingialehkai ka la iakhaid biang ha ka minit kaba 51 hadien ba u M e d o n b a n s h a n Myliemngap u la pynkhih ia ka kol kaba ar na bynta ka Rynjah. Hynrei ka Umrynjah ka la pynskhem ia ka jingjop da kaba thep sa lai tylli ki kol, ha kaba ar tylli la thep da u Balviki (63 & 90+2min) ban kynjoh

Hynrei sa shi sien pat ka Imson ka la ioh biang ban pyniakhaid, mynta ka kynti ka dei ka ha ka minit kaba 87 lyngba u Fidel Nongkhlaw. Wat hadien kane ka Imson, kam shym la lah satia ban pynthikna ia ka point bad ban khanglad ia ka liang pyrrshah namar ha ka khyllipmat shuwa ban kut ka Lumparing ka la wanphai biang ban lamkhmat lyngba u Sholinstar Syngkli (90'+3) bad khur syndon ia ka jingjop.

Ka jingialehkai ba khatduh jong kane ka sngi la sakhi ia ka Iatylli SC kaba la pynliem ia ka Gorkha Association da 2-1 kol. U Joinborlang Kharumnuid (8') bad u Iatyllibor Mynsong (73') ki la thep na bynta ka Iatylli, katba u Yash Kanwar (67') u la pynphai na bynta ka Gorkha Association. Ka jingialehkai mynta ka sngi kan long hapteng ka Laitlyngkot pyrrshah ia ka Lamlynti Madanlyngkhi, ha ka por 10 shiiteng mynstep.

Kyrshan u Arteta ia ka jingpyniaid jong ka Arsenal halor ka kynrum kynram ha kaba iadei bad u Partey

SHILLONG, Naitung 21: U Mikel Arteta, coach jong ka Arsenal, ha ka sngi Nyngkong, u la iada ia ka rukom leh jong ka klob, halor ka jingiakhaid noh jong u Thomas Partey, hadien ba une u rangialehkai ka Ghana, u la shah kem halor ka jingsuba ba u donkti haki kam leh bejot. Ka Arsenal kam shym la tyrwa ia ka kontrak kaba thymmai sha une u rangialehkai ba 32 snem ka rta ha kaba kut jong ka

samoi ba la dep bad hadien katto katne sngi u la shah pynngat kyndon ha ki pulit jong ka ri Bilat halor san tylli ki kam leh bejot bad jrong kti kynthei hapteng u snem 2021 bad 2022. Katkum ki tyllong khubor u Partey, u dei ban leit hajir hakhmat ki majistor ha London, ha ka 05 tarik Nailar. Ha ka kyrwoh jingpynbna ba la pynmih ha ka 04 tarik u Naitung, ka sngi ba la kem ia u Partey, ka Arsenal ka la ong: "Ka jingiateh kontrak jong une



u rangialehkai ka la kut noh ha ka 30 tarik u Jylliew. Namar ka jingtohkkit kaba dang iaidei shakhmat ka klob kam lah ban kren eiei halor kane ka mukotduma." Na ka liang jong u Mikel Arteta, u la ong ba u sngewskhem "100 percent" ba ka Arsenal ka la bud ia ka rukom treikam kaba dei, da kaba bynrap, "Ka klob ka la kren shai bha ha ka kyrwoh jingpynbna jong ka.

Ki don shibun ki kam aiñ kiba eh bha kumta Ngam lah ban kren eiei halor kano kano na kita." U Partey u la iasoh bad ka Arsenal ha ka dor kaba £45 million na Atletico Madrid ha u bnai Risaw jong u snem 2020. U la mih madan 35 tylli ki jingialehkai ha ka Premier League ha ka samoi ba lade, da kaba thep 4 kol, bad u la mih madan 12 sien ha ka Champions League.